

天去孔昇天二千萬炁太煥者則極瑤天之始元也亦明始開八字煥乎空玄之上而極瑤之天於是植焉馥朗是天中玉京玄臺之別號西靈真人常誦无量洞章旋行其上廓奕則是天中神公之內名與元始同生為玄

炁之範圍滅度之門教學仙之人君能明八字之音則神公開長冥之戶身入更起之門上登玉京之臺歡樂紫微宮中有神經之章滅度之屍得神經之童一歌无量之章立得返形於三鍊之房身受自然之炁歡樂無窮之齡也

元始天尊告太上道君曰亦明始開其八天之炁分度並屬南方丹天天有八字合六十四音皆天中大梵隱語無量之音行三炁天君之道當佩其音誦其章出入遊行常當叩齒三通思朱雀鳳凰翻翔其前絳雲三重覆帔身形密咒曰

三炁徘徊 靈鳳來飛 玉音八字 煥爛紫微 日吉大慶 我道洞開 朱丹甫始 仰翕靈輝 身生水火 絳帔羽衣 登空玄步 足踐鳳梯

周旋八天 七祖相隨

畢引炁三嚙止行之三年八天各以太丹玉女太陽玉童各八人侍衛身形降致朱丹三炁之精返白留容萬劫不傾七祖同昇上入福堂返胎王家即得更生其法弘普廣度無窮勤為用心諦受勿忘道君稽首奉受命旨

太上靈寶諸天內音自然玉字卷之三

太上靈寶諸天內音自然玉字卷之四 收四

元載孔昇天音第一

元載孔昇天中有自然之書八字文曰刀利禪猷婆泥仗通天真皇人曰其八字飛玄自然之書字方一文文彰煥曜洞明八方元始

下教使撰其字解其音合成孔昇天中大梵隱語无量之音以付道君使教孔昇天中宿有仙名者度應得道人也

元載切悅境 利浮爛洞陽 禪享苦生界 猷命化南宮 婆耶有鍊池 泥津飾彫容 仗醜過生源 通勃肆鼓洋

天真皇人曰其章以孔昇天中合五方飛玄之炁以和八字自然之音曰无量洞章孔昇天去皇崖天九百萬炁元者元之始載梵行之炁以成孔昇之天刀利者南無際世界之號禪是刀利之國生存其國則為苦生無善之根其界上有洞陽之官浮爛為流火之庭榮飾光芒靈文既明刀利國土改為福德之堂苦生之魂皆得度入洞陽之宮猷是南上好生君內名也婆泥則鍊池之靈童也苦生

之人得度洞陽之官皆詣鍊池受靈童之鍊而更生福德之世各通刀利世界之魔神常過人生生之路人知好生君名詣靈童而受鍊魔神即奉之焉學得八字之音則刀利之境无極靈官侍衛其身而造南霍則仙人伺迎三年必能策舟霄之輪上昇三炁之天也

太安皇崖天音第二

太安皇崖天中有自然之書八字文曰宛蕪滌色太眇之堂天真皇人曰其八字飛玄自然之書字方一文文彩煥曜洞明八方元始下教使撰其字解其音合成皇崖天中大梵隱語无量之音以付道君使教皇崖天中宿有仙名者度應得道人也
太安宛太漢 蕪遙但赤明 滌蕩塵滓氣
色界大羅音 太漢導真科 眇邀空洞經
之歷飛天誠 堂堂更化生
天真皇人曰其章以皇崖天中合五方飛玄之炁以和八字自然之音曰无量洞章皇崖天去極風天八百萬炁太者虛之名以安皇崖之天天有帝玉監名宛蕪而開太漢之徑

以明八字之文明道既彰大羅之上鬱然澄清滌色者是色界上飛天真人也常乘景雲之車駕九色之龍遊乎三界之上出入玉清之中蕩除塵滓之炁開度善根之人太眇為空洞之化結自然之章理明道以教導勸探度於萬生學見八字之音洞知天中之名飛天降致景雲之車載兆上昇化生之臺也

顯定極風天音第三

顯定極風天中有自然之書八字文曰流羅梵萌景蔚蕭闕天真皇人曰其八字飛玄自然之書字方一文文彩煥曜洞明八方元始下教使撰其字解其音合成極風天中大梵隱語无量之音以付道君使教皇崖天中宿有仙名者度應得道人也
極風流元景 羅暉曜九玄 梵網迴天劫
萌邃固玉根 景行歷長夜 蔚秀落華年
蕭仞空中立 闕上對清賓
天真皇人曰其章以極風天中合五方飛玄之炁以和八字自然之音曰无量洞章極風天去孝芒天七百萬炁極風洞極之炁網維

八負而成天也天立而八字明焉流者天王之內名處乎紫霄之上遊觀玉京之山羅者月女之諱流暉極風之天洞照九玄之負梵則飛天之人萌則元始之神飛天則迴九天之關大神則固極風之根景皇四上真人蕭蔚亦是景霄仙人並治玉京之臺常乘三色之雲歷校長夜之中料生死於簡籍開度善根之魂萬劫長對並係之焉若修靈爻於洞章則仰披九玄之房乃得駕三色之雲上昇景皇之羣拔九幽之魂死骸更生法輪之門

始皇孝芒天音第四

始皇孝芒天中有自然之書八字文曰易邈無寂宛首少都天真皇人曰其八字飛玄自然之書字方一文文彩煥曜洞明八方元始下教使撰其字解其音合成孝芒天中大梵隱語无量之音以付道君使教孝芒天中宿有仙名者度應得道人也
始皇易有炁 邈哉何寥寥 無形空中有
寂庭秀玉標 宛覺摩羅真 首負三素飄
少童翼朱日 都圓煥幽寥

天真皇人曰其章以孝芒天中合五方飛玄之炁以和八字自然之音曰无量洞章孝芒天去淨容天六百萬炁始皇天中大梵始行之炁以綱維孝芒之天天中有天王號曰易邀從龍漢而來亦明而出在始開之中故曰

寂寥在虛無之內處乎寂寂之庭神景玉秀為萬道之標宛首者太上道君之號道君駕乘八景玉輿策三素之雲開元始之玄奧演大法以度人少都是日中靈童名也恒散日精以濯真流飛華以拂靈披長夜之戶明九幽之房學聞天中之音則洞天中之名天王下飛景之輿降三素之輶度身三界之上進入寂寂之庭也

太皇翁重淨容天音第五

太皇翁重淨容天中有自然之書八字文曰阿縊郁世華漢延由天真皇人曰其八字飛玄自然之書字方一文文彩煥曜洞明八方元始下教使撰其字解其音合成翁重天中大梵隱語无量之音以付道君使教翁重天中宿有仙名者度應得道人也

太黃阿雲樓 繼波霄上吟 郁然遏玄路 竺頌歌謠音 華界多欲門 漠漠不可尋 延演億萬眾 由庭成鬼林 天真皇人曰其章以淨容天中合五方飛玄之炁以和八字自然之音曰无量洞章淨容

天去江由天五百萬炁太皇中元之炁梵太漠之綱以成翁重天天有九層之樓結雲炁而裁裁阿縊者則天王之隱名常乘景霄之輪遊觀九層之阿處玉樓之上上鳴洞章以召魔王上為真仙之館下為鬼神之家郁然者為天中魔王之隱名竺頌則是魔王之部伯也恒在欲界之上誦詠空洞之歌延演則是東鬼之庭由者則為禁鬼之房天王上登雲樓之上吟誦无量之章則天魔應響而來羣鬼詣由而伏形真人常佩八字而飛空誦无量而登玉清竊其音則洞徹盼其篇則洞靈奉之者則九祖開泰修之者則死骸而更生也

無思江由天音第六

無思江由天中有自然之書八字文曰九開

自辯阿那品首天真皇人曰其八字飛玄自然之書字方一文文彩煥曜洞明八方元始下教使撰其字解其音合成江由天中大梵隱語无量之音以付道君使教江由天中宿有仙名者度應得道人也

九玄乘運明 開清長夜宮 自以靈運會 辯集大化通 阿丘超龍嶺 那耶翼三房 度品飛天眾 首化以成童 天真皇人曰其章以江由天中合五方飛玄之炁以和八字自然之音曰无量洞章江由天去既樂天四百萬炁九開大衍之數天地未先有九分之關轉輪三炁九度明焉江由天炁於是而立九五列位開定陰陽法化流演萬品受生阿丘天王之內名常乘九色之龍駕三素之輶上登龍山之巔遊觀九玄之中那耶者飛天神人之隱諱飛行三界之上歷披長夜之宮開九幽之房拔度善人之魂有明八字之音誦詠无量之章則九祖得出長夜之府幽魂更生朱陵之宮可謂朽木生華死骸還童長修不忘則飛天齊功也

華死骸還童長修不忘則飛天齊功也

上撰阮樂天音第七

上撰阮樂天中有自然之書八字文曰无量
扶蓋浮羅合神天真皇人曰其八字飛玄自
然之書字方一文彩煥曜洞明八方元始
下教使撰其字解其音合成阮樂天中大梵
隱語无量之音以付道君使教阮樂天中宿
有仙名者度應得道人也

阮樂無為始 量度飛天人 扶曦通幽夜
蓋慶流上玄 浮爽乘運歸 羅界開大千
合慶更生寅 神公定命年

○天真皇人曰其章以阮樂天中合五方飛玄
之炁以和八字自然之音曰无量洞章阮樂
天去曇摺天三百萬炁阮樂天中有无量品
大聖衆无量則大衆之始神也總統飛天之
人皆受其品量而得遷昇也扶曦者則更生
真人內名常校幽夜之錄簡善惡之根善者
受其開度惡者極其對根蓋者玄中之福堂
大號也幽夜之魂受真人開度謂之浮乘運
而歸上昇福堂羅者大羅也而開大千世界
間合更生之賓上詣大羅之天神公是大羅

天之丞相為受更生之賓定命籍於朱宮削
死根於三官也學知八字之音則九祖受福
於真人拔幽夜之萬劫受更生於神公也

无極曇摺天音第八

无極曇摺天中有自然之書八字文曰玉誕
長桑栢空度仙天真皇人曰其八字飛玄自
然之書字方一文彩煥曜洞明八方元始
下教使撰其字解其音合成曇摺天中大梵
隱語无量之音以付道君使教曇摺天中宿
有仙名者度應得道人也

曇摺玉都上 誕壽秀東華 長條斑紫洞
桑林翠碧霞 栢齐和神風 空生自然歌
度人三界庭 仙堂養雲芽

○天真皇人曰其章以曇摺天中合五方飛玄
之炁以和八字自然之音曰无量洞章曇摺
天去霄度天二百萬炁玉誕者曇摺天中都
名也上有騫林之樹覆蔭東華之宮騫林之
葉有大洞之章紫書玉字煥乎上清下有扶
桑之樹上森騫林之叢碧雞鳴其蓋青霞翠
其峯神風流返香之草以鼓桑林百韻之音

神風一詠空生洞章度仙者曇摺天中飛天
神人也常以雞鳴之始上登玉臺之上仙堂
之中取五方雲芽之精仰咽日月三晨之光
常簡學仙之人生死錄籍開度九幽之魂昇
入法輪之門學知此法則能策神風以飛煙
上昇騫林之叢次四七祖則出長夜之府上登更
生之官也

元始天尊告太上道君曰赤明始開其八天
之炁分度並屬西方素天天有八字合六十
四音皆天中大梵隱語无量之音行七炁天
君之道當佩其音誦其章出入遊行常當叩
齒七通思白虎師子導引左右素雲三重覆
而身形密呪曰

七炁金靈 八天尊神 白虎策輦 師子捧轆
七炁纏綿 鍊我成仙 身發金光 肺映素雲
內外變化 昇入洞門 七祖出夜 九幽放魂
三塗五苦 長斬惡根 同歡福舍 受慶自然
億劫開度 隨運長存
畢引炁七咽止行七年八天各以太素玉
女玉童各八人侍衛身形降致太素七炁

之薰留年住世萬劫童顏度及七祖昇度
南宮返胎更生世世王門大乘妙道普度
天人勤為用心勿忘我言道君稽首奉受
命旨

皓庭霄度天音第一

皓庭霄度天中有自然之書八字文曰覆無
自有九日導乾天真皇人曰其八字飛玄自
然之書字方一大文彩煥曜洞明八方元始
下教使撰其字解其音合成霄度天中大梵
隱語无量之音以付道君使教霄度天中宿
有仙名者度應得道人也
霄度覆靈運 无量洞得真 自抗不終劫
育生保長年 九會應玄機 日童披夜還
導蕩長夜戶 乾門鍊五仙
天真皇人曰其章以霄度天中合五方飛玄
之炁以和八字自然之音曰无量洞章霄度
天去元洞天九萬九千炁霄度是元始始開
之炁演津無色之中覆無是龍漢之天飛天
神人也元始始開之際覆無乘運而出疑自
然之精而立霄度天焉故曰无量而得真也

霄度既立而自抗不終天劫育者霄度天王
之內名常駕象輪之車遊行九玄之門轉九
機之度以應劫會之期天運之終而日童停
先拔度學者之人灌以水母之精導以太和
之炁攝召長夜之魂得出九幽之戶皆上詣
天門受鍊五神進昇朱陵之宮受福祿於天
堂逍遙無為永居自然也

端通元洞天音第二

端通元洞天中有自然之書八字文曰坤母
東覆形攝上玄天真皇人曰其八字飛玄自
然之書字方一大文彩煥曜洞明八方元始
下教使撰其字解其音合成元洞天中大梵
隱語无量之音以付道君使教元洞天中宿
有仙名者度應得道人也
元洞坤幽戶 母宮運地關 東河受靈會
覆山繞長源 形居無窮炁 攝鳥對帝君
上選皇生錄 玄圖記仙人
天真皇人曰其章以元洞天中合五方飛玄
之炁以和八字自然之音曰无量洞章元洞
天去妙成天八萬八千炁端通者通元之炁

炁凝而成元洞天也坤母者太陰都候九靈
之母治在東海扶桑賜谷之淵常總地機輪
轉元炁上應天關天關轉地機動周天一度
水則涌三千三百度九江涌溢水則彌天東
海受會制期河源覆山水神也治於須彌之

山以山鎮固於巨海遏斷於長源則地機而
不淪保劫而長存會之欲交而坤母出東海
之上攝召鳥母鳥母則水之候神上詣帝君
而申劫會以度學仙之人上選者上帝司命
也水欲出而司命科枝學仙人名上言玄都
之宮有知八字之音大水出時則鳥母迎以
鳳車上登須彌之山倏歛之間而天地都清
矣

太文翰寵妙成天音第三

太文翰寵妙成天中有自然之書八字文曰
陀羅育邀妙炁合雲天真皇人曰其八字飛
玄自然之書字方一大文彩煥曜洞明八方
元始下教使撰其字解其音合成妙成天中
大梵隱語无量之音以付道君使教妙成天
中宿有仙名者度應得道人也

妙成阿陀嶺 羅輝曜玉階 育生部十部

邀匡三界畿 眇眇行上雲 炁結成羽衣

合景北靈館 雲上携手飛

天真皇人曰其章以妙成天中合五方飛玄

之炁以和八字自然之音曰无量洞章妙成

天去禁上天七萬七千炁妙成以龍漢洞玄

之炁亦明開運其炁於空洞之中與五篇真

文結炁俱明元始號妙成之天陀者天帝之

內名與妙成俱生在雲阿之嶺羅者是月妃

之內名陀在雲嶺之上抱月而明也妙成立

而有天中神字曰育生總統十方飛天之神

也邀是天中神王羽林監神王常使匡御三

界之上以簡人生死之籍主魔王保舉得道

之人得魔王保度上詣羽林監受符以昇天

眇眇行雲宮之中羽林結雲炁以成衣身衣

結雲之衣遙入朱陵之宮而受福於天宮則

與飛天合景雲上而飛也學知天中之音則

三界所稱也地祇奉迎洞明鬼神而坐知自

然三十二年則能駕空飛行三界遊乎上清

七祖即得開出長夜度身朱官逍遙無為衣

食自然也

太素秀樂禁上天音第四

太素秀樂禁上天中有自然之書八字文曰

飛天大醜總監上天天真皇人曰其八字飛

玄自然之書字方一文文彩煥曜洞明八方

元始下教使撰其字解其音合成禁上天中

大梵隱語无量之音以付道君使教禁上天

中宿有仙名者度應得道人也

秀樂飛空經 天人誦靈書 大醜妙法羅

醜伯促運除 總攝八會炁 監度長夜軀

上受南宮食 天賓同福廬

天真皇人曰其章以禁上天中合五方飛玄

之炁以和八字自然之音曰无量洞章禁上

天去常融天六萬六千炁秀樂者則禁上天

飛玄之炁而結成空洞之經以度禁上天人

飛天者是十方飛天神王也常在飛玄之上

而誦空洞之經以和自然之炁拔度學道之

人大醜則三界之都錄主生死之圖籍醜伯

則是三界之魔王常受事於大醜學識其音

則享福不知其音則被殃故得魔王保舉而

身昇三清也總是飛天都統之官常攝八會

之炁以促天地之運炁監則天王之監領長

夜之宮校學道簿錄開度九幽之魂學知天

中之音則天王之監列言大醜勤錄仙簿得

為真人九祖父母即出長夜上昇南宮逍遙

歡樂與飛天同賓也

太虛無上常融天音第五

太虛無上常融天中有自然之書八字文曰

沙陀劫量龍漢瑛鮮天真皇人曰其八字飛

玄自然之書字方一文文彩煥曜洞明八方

元始下教使撰其字解其音合成常融天中

大梵隱語无量之音以付道君使教常融天

中宿有仙名者度應得道人也

常融沙蘭宮 陀丘巨億人 劫運改大羅

量度飛天真 龍為無崖固 得道難可新

瑛勃保靈運 鮮童歡長年

天真皇人曰其章以常融天中合五方飛玄

之炁以和八字自然之音曰无量洞章常融

天去騰勝天中五萬五千炁常融天是無上

洞極之炁而結成天中有沙蘭之宮是紫

微之別館處乎玉清之上煥乎紫虛之中中有陀丘之衆巨億萬人陀丘者是新得度受靈之人也功德未備故散處其中劫運一交則陀丘之衆計功之重而得昇度朱陵之宮受福而仙也龍者龍漢之時道始純朴徒有其化難可為新瑛勃者龍漢之時飛天神人也常開度九幽之魂度蘭宮之中鮮者南宮之童學人得度而鮮童鍊其形容度於朱陵之上受福於歡樂之堂也

太釋玉隆騰勝天音第六

太釋玉隆騰勝天中有自然之書八字文曰碧落浮黎空歌保珍天真皇人曰其八字飛玄自然之書字方一文文彩煥曜洞明八方元始下教使撰其字解其音合成騰勝天中大梵隱語无量之音以付道君使教騰勝天中宿有仙名者度應得道人也
 騰勝碧重雲 落羅曜上玄 浮空禮七寶
 黎度慶玉文 空嘯詠靈風 歌章歡天賓
 保此不終劫 珍我自然篇
 天真皇人曰其章以騰勝天中合五方飛玄

之炁以和八字自然之音曰无量洞章騰勝天去梵度天四萬四千炁騰勝昔赤明九鍊之炁以成騰勝之天中常生碧霞之雲炁以陰騰勝之天落者雲中飛天之神常乘碧霞之輦遊於騰勝之天一日三時引天中之衆聖上朝七寶之宮浮黎天王之內名象聖上朝而天王稱慶焉空者天中之侍宸嘯而靈風聚煙靈風既鼓音成洞章學知八字則明天音七祖去離九幽之府上昇南宮為飛天之賓保此不終之劫珍其自然之功既入無為之堂而保我至真之篇也

龍變梵度天音第七

龍變梵度天中有自然之書八字文曰惡奕無品洞妙自真天真皇人曰其八字飛玄自然之書字方一文文彩煥曜洞明八方元始下教使撰其字解其音合成梵度天中大梵隱語无量之音以付道君使教梵度天中宿有仙名者度應得道人也
 梵度惡綠界 奕奕昇靈門 無中拔長夜
 品量九幽魂 洞明宿對報 妙覺有始端

自入歡樂舍 合真齊仙羣

天真皇人曰其章以梵度天中合五方飛玄之炁以和八字自然之音曰无量洞章梵度天去賈奕天三萬三千炁梵度天從龍漢後一劫而受龍變之號結大梵之炁而成天焉惡奕者天王之內名住於龍漢之中諸緣盡而得過度三界之庭昇入太虛之館受九仙之鍊而得進登大聖之號亦明開運元始錫為梵度天王故奕奕而昇靈門也無者太元真人受天王之符而度長夜之魂品量功德之鍊斷絕宿命之根受度之魂既去九幽之對而得度妙化之堂便識宿命其有始端思緣盡道遙歡樂之舍與飛天而合真也

太極平育賈奕天音第八

太極平育賈奕天中有自然之書八字文曰元梵恢漠幽寂度人天真皇人曰其八字飛玄自然之書字方一文文彩煥曜洞明八方元始下教使撰其字解其音合成賈奕天中大梵隱語无量之音以付道君使教賈奕天中宿有仙名者度應得道人也

太極元始炁 梵行大羅青 恢廓洞崖上
漠漠無象形 幽中有妙真 寂中自生精
度我六梵行 人化三界庭

天真皇人曰其章以賈奕天中合五方飛玄
之炁以和八字自然之音曰无量洞章賈奕

天去梵行天二萬二千炁太極者無數之極

而登大羅之上號賈奕天元梵則元始風澤
之炁抗舉澄漢之精高而洞浮懸而不落恢
漢者遠而無礙有而若無微不可名妙不可
尋幽兮寂兮其中有真真中生精度學者之

身六梵之行人如六梵而即化形道遙三界
之上遊乎大羅之青名入賈奕天錄九祖並

度大羅之宮受福於七寶林也
元始天尊告太上道君曰大運啓期亦明始
開其八天之炁分度並屬北方玄天天有八

字合六十四音皆天中大梵隱語无量之音
行五炁天君之道當佩其音誦其章出入遊
行常當叩齒五通思飛龜羽蓋翳鬱左右玄
雲三重覆而身形神童玉女羽衣飛裳侍衛
前後密呪曰

玄天徘徊 流景上清 大有啓運 八字高明
飛玄澄虛 洞音自生 五炁纏綿 灌我身形
冠帶北單 受鍊洞靈 賢府化仙 內水光精
飛行三界 遊宴紫庭 七祖同慶 歡樂劫齡
七寶林中 返胎更形 長夜滅死 南宮記名

黃籙白簡 世世生仙

畢引氣五噤止行之五年八天各以太玄
玉童玉女五人侍衛身形降致玄滋五炁
之精停年留劫保命三清七祖同慶世世
生仙其法高妙深寶勿輕道君稽首奉受

命旨

天真皇人稽首上白

天尊自受日月隨運流遷去來轉輪一光一
冥一滅一度一死一生身受破壞一敗一成
經履天地改易光明幽幽眇邈非可思議自

龍漢以來已九萬九千九百萬重劫緣對相
牽世世不絕至于今日亦嘗生王門亦嘗生
賤家亦嘗生富室亦嘗生窮寒亦嘗生人尊
亦嘗為僕使亦嘗嬰六疾亦嘗受光明亦嘗
受智慧亦嘗受愚聾諸行備經身未奉定惡

對緣生而作無道非人所行不敬天地不畏
鬼神不慈不孝傷害衆生死猶劍樹足踐刀
山或入寒夜或入鑊湯流曳三塗五苦之中
形魂楚撻痛毒備嬰萬劫對苦乃得還生六
畜之中年命無幾更受死壞方復還充五獄

長徒東嶽作役無所不更千劫受苦乃得還
生邊夷之中雖有人形而無人情年命無幾
身復死壞魂逝四瀆連汲溟波陰炭寒冰晝
夜無寧百劫對盡乃得還生賤人之中六疾
醜陋可憎之極年命無幾復受死壞魂入長

夜九幽之中配役三河罽塞長源寒蕪切肌
諸苦備經一切緣盡乃得更生人中之門形
容端正人道備足年命無幾復受死壞魂魄
方還三官都使驅馳百極流離鬼庭萬年罪
竟乃得還生善人之門財寶無乏雖受寬泰

年命無幾復受死壞魂神方還三官善鬼受
任都伯統承生死千年根斷乃得受生通靈
徹視坐見鬼神役使召制助國救民或輔
帝王平斷四方年命無幾復受死壞魂神乃
得為五帝賓友交遊神仙百年根對並消地

誦周竟三官都統諸天記名乃得受生富貴之門王侯之家榮祿難勝根盡福生發心大願布散窮乏廣作功德而受滅度徑上天堂逍遙歡樂衣食自然二十四年更生貴門受悉智慧五心開聰修奉經法財重道慈心一切恭敬師寶功德未全復受滅度上昇南宮朱陵度我命籍三界書我功名周流十方三十二天交遊上聖為太上之賓十年還在人中身作師宗宣通法音開度天人教化羣生展轉億劫無所不經死備三官徒對年限垂竟而又行惡心罪倍於常更受死壞復還三官對於徒謫苦痛過先如此一善一惡一緩一急一死一生一惱一歡艱辛輾轉億劫之中諸惡漏盡福德自生乃得還在富貴之門道得因緣供養經法七寶告靈發心善願功名得全為三界所舉五帝所明降致雲輿八景瓊輪駕空乘浮白日昇晨被蒙天尊曲遠重恩拂飭朽骸得見光明超凌三界位登天真今日侍座歡樂難言天尊不以先昔所見淺狹觸事無能見使注筆解說天音命重

教嚴不敢隱情輒極所見悉表乃心雖不親縷然經歷前生億劫以來遊涉天元隨法生死恒值真文自不履其玄化洞於本根將感以私短而切申自然之書以解曲違之文振琳琅之響叩瓊瑤之音義體雖不都備由足申演天地之根矣其諸天之中闕伏度數氣象變化日月星宿宮室山林真人城臺及魔王鬼神應承之所由其事深奧亦非可都詳且問難因緣亦已舊章載不復一二論為煩重今粗解天書五合文義其道足以開度天人拔諸苦根大法開張澤被十方今生來世男女善人當得此恩然按元陽玉匱九天推數運行靈關周迴三十二天一交偽道出行萬姓心懷詐共崇奉此文當還大羅之上七寶宮中三五周竟萬道勢訖大聖隆興下世度人誅罷偽塵退翦連民道德興隆天下太平國主享祚十方寧焉真經輔世善瑞日生壬子之初乙卯之年至甲子之旬當有青帝九種仙人乘九色之龍出遊泰山齋此真經以掃不祥真經下世角音龍釋得遇吾此道

其作自強以保甲申普度天人其時歡樂此經之功也奉之者享福修之者神仙斯文玄奧廣覆無窮大法尊重伏願天尊普告諸天上帝大聖尊神日月星宿地上地下五嶽四瀆及河海水帝神仙真人十方世界諸靈官一切依大有之格俯仰之科禁儻漏慢秘而奉焉是時天尊舉手彈指天上下地上下無極世界一切神靈莫不祕奉諸天大聖眾同時稽首長跪稱善天尊告四座大聖眾元極太上大道君三十二天十方尊神等天真皇人曰龍漢之前在延康之中隨運生死至于龍漢乃受緣對魂形艱苦塗炭三官緣盡根斷得入福門經履天地一成一敗無復限極涉見天元恒值靈寶世世出法化度天人是

以洞究天中之事能解天書自然之文大法開明諸天所崇宜宣至理音究朗然故今注筆解其曲逮合和五方无量之音以成諸天普度衆生其中玄奧信而可尊靈音既朗諸天光明天上天下地上地下十方無極世界

一切神靈莫不崇奉依明真玄科舊制以玉童玉女各二十四人燒香侍真檢慢糾非不得輕宣四萬劫一出下世度人明各檢慎勿使有言是時四衆一時作禮稽首稱善

天真皇人曰天書尊重度人无量貴而享福

慢而禍臻諸是上天已得道過去无極大聖

至真尊神及飛天神人五嶽神仙莫不備受

崇奉天文自然之音以成至真者矣自非宿

名金籙玉字上清終不得見脫於漏慢之中

見其篇目神迷其心終不開悟有其宿分自

當發心願樂神文生過其世與文相值當齋

七寶紋繒之信詣師告盟上聞諸天受而佩

身得佩此文諸天所敬三界所稱五帝所侍

地祇奉迎一切神靈莫不朝門將拔九祖於

長夜開度死魂於九冥返受胎於靈氣得受

生於富貴之門長與諸天交遊提携太上之

寶也

五老帝君宣告諸天地上五嶽靈山三河四

海神仙真人玉女一切神明天真皇人開大

有之妙化通自然之靈文天書尊重禁不輕

傳今生男女心不壞二敬信自然受之者皆

得昇度奉之者皆得長年輕財重法致魔不

言來生男女心當破壞各懷偽贗貴財賤道

不信至真縱有歸向多以浮華意志不專貪

竊窺鏡致魔有言故玄科告禁以七寶紋繒

質求人心有至學之士依科齋信便言名諸

天頒告五嶽地上神仙一切記名宣示魔王

保舉三清然後而傳有違玄科身負風刀萬

劫無還九祖填夜長役河源一切神靈明識

此言

天真皇人告五老帝君我嘗於龍漢之中受

文於無名常存之君俯仰之儀以丹筆書諸

天八字之音合二百五十六字以黃繒為地

佩身依明真玄科以金銀珊瑚瑠璃碑磔水

晶瑪瑙七寶鎮靈五色紋繒各四十尺以奉

神真玄科之信不得輒虧至於有心窮乏不

備貴得表真當量其輕重宜而投焉

西王母以上皇元年七月丙午於南浮洞室

下教以授清虛真人王君傳於禹封於南浮

洞室石磧之中大劫交運當出於世以度得

道之人

太上靈寶諸天內音自然玉音卷之四